



ლიბერალი 6 წლისაა

19.05.2015

„კომპანიებზე მორგებული კანონმდებლობა“ - „მწვანე ალტერნატივის“ კვლევის შედეგები



ნათია ამირანაშვილი

შეუერთდი განხილვას



„კომპანიებზე მორგებული კანონმდებლობა“ - ამ ქვესათაურით აქვეყნებს „მწვანე ალტერნატივა“ კვლევას, რომელშიც განხილულია „საქართველოს „წითელი ნუსხისა“ და „წითელი წიგნის“ შესახებ“ საქართველოს კანონში შესული ცვლილებები, რომლითაც კვლევაში შესულმა სხვადასხვა კომპანიებმა ისარგებლეს.

ორგანიზაციის კვლევაში მოხვდა „ჰიდროელექტროსადგურ „შილდა ჰესის“ მშენებლობის საკითხი, რისთვისაც ყვარლის მუნიციპალიტეტში, სოფელ შილდის მახლობლად საზოგადოებრივი და სახელმწიფოებრივი მნიშვნელობის პროექტის -

„ჰიდროელექტროსადგურის „შილდა ჰესის“ მშენებლობის შეუფერხებელად წარმოებისთვის სს „GGEDC- ს“ (საიდენტიფიკაციო კოდი 406046130) მიეცა უფლება, თავის საკუთრებაში არსებული 9378 კვ.მ. მიწის ფართობიდან (საკადასტრო კოდი - 57.35.52.051) ამოიღოს გადაშენების საფრთხის წინაშე არსებული 27 ერთეული კაკლის ხე“.

კვლევაში აღნიშნულია, რომ „საქართველოს „წითელი ნუსხისა“ და „წითელი წიგნის“ შესახებ“ საქართველოს კანონი გადაშენების საფრთხის წინაშე არსებული ველური მცენარეების მოპოვების (ბუნებრივი გარემოდან ამოღების) უფლებას იძლევა, თუმცა არ არსებობს ამ ქმედების „საზოგადოებრივი და სახელმწიფოებრივი მნიშვნელობის“ განსაზღვრის სამართლებრივი კრიტერიუმები.

„ყვარლის რაიონში, მდინარე ჩელტიზე 5 მგვტ სიმძლავრის „შილდა ჰესის“ აშენების გამოცხადება ერთდროულად საზოგადოებრივ და სახელმწიფო მნიშვნელობად, არანაირ ლოგიკას არ ექვემდებარება“, - ვკითხულობთ კვლევაში.


ორგანიზაციის განცხადებით, განსაკუთრებულ აღნიშვნას იმსახურებს 2012 წლის მარტში საქართველოს პარლამენტის მიერ მიღებული კანონი, რომლის საფუძველზე, „გარემოს დაცვისა და ბუნებრივი რესურსებით სარგებლობის სფეროში ნებისმიერ სამართალდამრღვევს, გარკვეული თანხის სანაცვლოდ, მიეცა სამართალდარღვევაზე პასუხისმგებლობისაგან თავის არიდების შესაძლებლობა. იმთავითვე აშკარა იყო, რომ ეს კანონი შეიცავდა გარემოსდაცვით, კორუფციულ, ეკონომიკურ, სოციალურ და პოლიტიკურ რისკს და ეწინააღმდეგებოდა საქართველოს კონსტიტუციას, საერთაშორისო მრავალმხრივი ხელშეკრულებებითა და ეროვნული კანონმდებლობით დადგენილ გარემოს დაცვის ყველა ძირითად პრინციპს. ამ კანონით ისარგებლეს სს „მადნეულმა“ და შპს „კვარციტმა“; კომპანიებს 13 მილიონი ლარის გადახდის პირობის სანაცვლოდ, 1994 წლის 1 აპრილიდან 2012 წლის 14 მაისამდე ჩადენილი ყველანაირი დარღვევა და დანაშაული ეპატია ისე, რომ არ ყოფილა შეფასებული ამ 18 წლის განმავლობაში გარემოზე მიყენებულ ზიანის ოდენობა და არც დარღვევების სხვა შედეგები“.

„მწვანე ალტერნატივის“ კვლევაში მოხვდა ასევე საყდრისის არქეოლოგიურ ობიექტი. კვლევაში ნათქვამია, რომ 2012 წლის საპარლამენტო არჩევნების შემდეგ აღნიშნული კანონი გააუქმა კოალიცია „ქართული ოცნების“ უმრავლესობით დაკომპლექტებულმა პარლამენტმა, ხოლო საკონსტიტუციო სასამართლომ უკანონოდ ცნო, თუმცა, როგორც კვლევაში წერია, კვლავ გაგრძელდა „მადნეულისა“ და „კვარციტის“ სამართალმემკვიდრის - კომპანია RMG-ის სასარგებლოდ უკანონო აქტების გამოცემის ტრადიცია.

„კერძოდ, საქართველოს კულტურისა და ძეგლთა დაცვის მინისტრის ბრძანებით, დაკმაყოფილდა ამ კომპანიის უკანონო მოთხოვნა და ეროვნული მნიშვნელობის უძრავი

ძველის სტატუსი მოეხსნა ბოლნისის მუნიციპალიტეტის დაბა საყდრისის არქეოლოგიურ ობიექტს, რომელიც არაერთი ცნობილი მეცნიერის შრომების მიხედვით, 5000 წელზე მეტი ხნისაა და მსოფლიოში უძველეს ოქროს საბადოს წარმოადგენს (რასაც 2012 წლამდე პოპულარიზაციას უწევდა და საკუთარი საქმიანობის რეკლამისთვისაც კი იყენებდა RMG). ამ ბრძანების საფუძველზე, მისი გამოცემიდან 5 დღეში საქართველოს პრეზიდენტმა გამოსცა ასევე უკანონო ბრძანებულება, რომლითაც ეს ძველი ამოღებული იქნა ეროვნული მნიშვნელობის კატეგორიის კულტურის უძრავი ძეგლების ჩამონათვალიდან".

კვლევის ანგარიში ფონდი „ღია საზოგადოება საქართველოს“ მხაერდამჭერი პროექტის ფარგლებში მომზადდა, რომლის მიზანი ელიტური კორუფციისა და ბიზნესზე სახელმწიფო ზეწოლის შემთხვევების გამოვლენას ისახავდა.

ფონდის აკრედიტაცია